

Date – 09/09/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. All Mizoram CSS Employees Coordination Committee (AMCECC) chuan, sorkara an phût hrang hrangte tipuitling tura Mizoram sorkar an nawr nan vawiin atangin ni 3 chung Mass Casual Leave an la dawn.**
- 2. Health Minister, Pi Lalrinpuiin MUHCS hnuaiah State pawna inenkawl turte tan Medical Board paltlang tul tawh mah se refer kawngah harsatna a awm dawn lo a ti.**
- 3. Prime Minister Narendra Modia chuan NDA MP te chu tunhnaia sawrkar thutlukna pawimawhte chu nasa zawka mipuite hrilhhre turin a chah.**
- 4. Nepal sawrkarin Social Media a khap avanga thalai lungawilohna lantirnaa tharum thawhna thlengah mi 19 an thi a, mi 240 chuangin hliam an tuar.**

<><><>

css

Sorkar Department hrang hranga CSS hnuaia thawkte intêlkhawm, All Mizoram CSS Employees Coordination Committee (AMCECC) chuan, sorkara an phût hrang hrangte tipuitling tura Mizoram sorkar an nawr nan vawiin atanga ni 3 chung Mass Casual Leave an la ang.

All Mizoram CSS Coordination Committee General Body Meeting chuan tun thla ni 3 khan thuchhuah siamin, Mizoram sorkara an dinhmun siamthatna tur resolution an siam a, resolution-ah chuan CSS employee-te'n Regularisation Scheme an hman ve ngei theih nan siam rem ngai siam remsak tura sorkarin ngaihtuahna a sêng miah lo leh, DPAR Minister thurawn anga AMCECC-in representation an thehluh tawh lehkha an tihbosak leh, a thlenna tur official hnen a thleng lo chu mak an tih thu an sawi a, hei hi rang taka ngaihtuahsak a, tihhlawhtlinsak turin sorkar an phût a. Mizoram sorkar hnuaia thawk CSS employee-te'n Regularisation of CSS Employees Scheme, 2024 hnuaia department hrang hrang proposal an hnâwl zel laia CSS pawh ni lo, Health department hnuaia thawk health worker mi 31, MR skilled-II, PE-a convert-te he dan hmanga an dah ngheh te chu sorkarin cancel turin an phut bawk a, CSS hnuaia thawkte 'dan lo anga lak' tia Chief Minister-in 2025 Independence Day lawmnaa a sawi chu nâ an tih thu sawiin, CSS hnuaia thawkte chu dan ang thlapa lak an ni a, dan lo anga lak an awm chuan, dan lo anga latute chu zawng chhuaka action na taka la turin an phut bawk a ni.



SPEAKER

Assembly Speaker Pu Lalbiakzama'n General Purpose Committee (GPC) thurel tawh Council of Ministers in tihdanglam a ni ngai lo tih chu MNF ministry kal taah khan a lo awm tawh tih a sawi.

He thu hi nimina a pisaa thuthar thehdarhtute a kawmnaah sawiin, Assembly Speaker Pu Lalbiakzama chuan MNF ministry kal ta kum 2020 March ni 4-a GPC meeting-ah khan MLA te housing loan instalment a pekchhuah thin tihbo a, tum khat a lak theih dan tur a rawtna , Mizoram Legislative Assembly (Grants of Loans and Advances to Members) Rules, 2000 a Sub-rule(d) of Rule 4 delete tura a rel chu kum 2020 July ni 12-a Council of Ministers meeting chuan a lo pawm lo tawh a ti a. Tun tum a GPC thurel tawh Council of Ministers in a defer kha MLA te Travelling Allowance cheng nuai 2 ni thin , nuai 3.00 a tihpun chungchang a ni tih sawiin,

GPC ah khan hnial pawl te pawh awm tho mahse committee ah chuan a tam zawk ngaihdan anga kalpui thin a nih avangin pass a ni ta a. Cabinet meeting chuan sum dinhmun te a duhawm lutuk rih loh lai a nih avangin mahni hamthatna lam chu hmanhmawh rih lova, sum dinhmun te en chung a la ngaihtuah tha leh turin an rel tih a sawi a ni.

Speaker chuan Assembly Secretariat chuan duhthusam loh lai leh tlin lohna tam tak an nei tih sawiin, theihtawp chhuahin, in siamthat an tum a, mipuite ti chi ai thei thil leh thil dikhlal ni awm tak a sawi te leh thuthang, mimal in sawichhiatna thleng thinte chu Side-A leh Side-B an ngaithlak hnuah ngaihdan siam chauh turin mipuite a ngen a ni.



HEALTH MINISTER

Health & Family Welfare Minister, Pi Lalrinpuiin MUHCS hnuaiiah State pawna inenkawl turte tan Medical Board paltlang tul tawh mah se refer kawngah harsatna a awm dawn lo a ti.

Nimina Mizoram State Healthcare Society (MSHCS) official Website - mshcs.mizoram.gov.in a tlangzarhnaah he thu hi sawiin Pi Lalrinpuii chuan Mizoram Universal Health Care Scheme MUHCS chu hlawhtling taka kalpui a nih zel thu leh chhawr tangkai tam tak an awm tawh thu a sawi a, MUHCS hnuaiiah Medical Board paltlang a tul chhan chu mumal taka kalpui duhna vang zawk a nih thu a sawi a. Emergency Case-ah pheih chuan awlsam taka kalpui a nih theih dan tur ngaihtuah zel a nih tur thu a sawi bawk.

Pi Lalrinpuii chuan Cashless system hman a nih avangin chhungkaw tam tak phurrit a chhawk thu leh he scheme zawmtu, empanelled hospital pawh an awm ve nual tawh thu a sawi a. Chumi a nih avang chuan mipuite leh sawrkar hnathawkte pawh empanelled hospital-ah zel in admit turin a chah a ni.

MSHCS CEO Dr. Lalhriatzuali Ralte chuan kumin April ni 1 atanga tun thlenga MUHCS dinhmun tarlangin Mizoram chhungah Empanelled Private Hospital sawm leh pakhat (11) leh Private Day Care Centre pathum (3) an awm

thu a tarlang a. Mizoram pawnah Empanelled Hospital 25 awmin, Deemed Empanelled Hospital 13 an awm bawk.

MUHCS hnuaiah hian Mizoram chung hospital-ah mi 30,565 te inentirna man tumsak tawh niin Mizoram pawnah mi 698 te inentirna man tumsak tawh a ni a. Heng mi 31,263 te inentirna man atana MUHCS in a tumsak tawh zat hi a vai belhkhawmin chu cheng vbc 42 leh nuai 6 a chuang tawh a ni.

<><><>

CHAMPHAI

Champhai District a Zokhawthar khua ah nimin khan Myanmar atanga raltlan te leh Zokhawthar a flawmngai pawl hrang hrang, All NGO hruaitute an inhmukhawm a, Raltlan te tana hriattur pawimawhte leh Mizorama an awm chhunga khawtlang inrelbawlina bakah khua leh tui ten an tih tur leh tih loh tur, Raltlan te pawhin an zawm ve turte an hrilhfiyah.

Zokhawthar YMA Hall a hun an hmannaah hian Damlo an awm fo thin avangin mi dangte nunna chhanna atana thisen pek kawngah midangte tan a thisen pek nachang hre turin Raltlan te hrilh an ni a, Mizo nihna a lungawi tur leh a theih chen chenah Mizo tawng hmang uar tur in an in chah a, unau in laichinna chawi nung zel tur leh vantlang in ziak leh ziak loh dan leh hrai Mizo in kan neihte chu raltlante hi hrilh fiyah an ni bawk. Zokhawthar YMA hruaitute chuan raltante chu thlamuang taka awm tur leh sual dona kawnga thawho pui atan an sawm bawk a ni

Zokhawthar khawtlang leh YMA chuan ruihhlo do kawngah nasa takin hma a la zel dawna tih tarlangin, mi awm tha duh lo leh buaina siana ruihhlo lama in hnam hnawih te chu an en liam mai mai loh tur thu YMA hruaitute chuan an tarlang bawk a ni.

<><><>

LITERACY RALLY

Kolasib SDEO leh Samagra Shiksha huaihawtin nimin khan Kolasib ah ULLAS Literacy Week Rally neih a ni.

Samagra Siksha District Project Coordinator leh SDEO Kolasib leh SDEO Kawnpui huaihawt in ULLAS Literacy Week Rally hi neih a ni a, he Rally ah hian zirlaiten ziak leh chhiar thiam pawimawhna ziahna te kengin kawng an zawh a. Hemi puala thuchhuah an siam ah ULLAS NILP Scheme hnuaiah Mizoram chu fully Literate State -a puan kan ni chungin, Periodic Labour Force Survey Annual Report ah za ah 98.2 chauh ziak leh chhiar thiam a la ni tih tarlang in, hei vang hian Mizorama cheng puitling ziak leh chhiar thiamlo engemawzat kan la awma ngaih a nih thu tarlan ani.

ULLAS Scheme hnuaiah hian puitling ziak leh chhiar zir duh zawnchhuahna Survey uar zawka neih tura hma lak mek anih thu Rally ah hian tarlan ani.

School Education Dept leh Sorkar laipui Ministry of Education, Literacy chuan International Literacy Day lawmna pualin tun thla September ni 1 atanga ni 8 chhungin ULLAS Literacy Week hmang turin ram pumah thuchhuah a siam a, hemi bawhzui hian Mizoram State Project Director,

Samagra Shiksha chuan Mizoram a District tinah ULLAS Literacy Week pualin Rally nei turin ruahmanna a siam a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

GST REFORM

Sorkar Laipuiin GST chhiah lak dan a siamthat avanga thil man a tlawm tawh dawn avangin ram mipuite thil lei a pung dawn a, ram mipuite chuan GST thar hi a taka hman hun an nghak thup tawh tih Economic lama mithiam ten an sawo.

Akashvani Aizawl-in a kawmnaah, Economics lama mithiam Pu Lalhunliana Ralte chuan bungrua leh thil chi hrang hranga mipuite atanga chhiah khawna, GST rate chi 4 hman mek a awm tih sawiin, zaa 28, zaa 18, zaa 12, leh zaa 5 te a ni tih sawiin, Prime Minister Narendra Modi chuan thla hmasaa August ni 15-a Independence Day-a a thu sawiah, GST chi hnihah siam a nih tur thu a sawi a ti a, America sorkar-in India atanga an rama bungraw lakluh atanga chhiah a tihpun hnuah India ram chhunga thil siamchhuah hralh tam chu sorkar laipuiin tul a ti hle a, hei hi sorkar laipuiin GST a siamthat chhan ni-a a lan thu a sawi a. GST tlawm chuan thingtlang khaw te ber thlengin a nghawng dawn tih sawiin, GST siamthat a nih avanga thil man a tlawm tawh dawn avang hian ram mipuite thil lei a pung dawn a, tunhmaa thil leitu lunghnur thinte kha a ti phur tawh dawn a ti a, sorkarin chhiah chunga chhiah lehchhawng cess a lak thin a awm tawh dawn loh avangin lirthei ke 2 nei chi te, car te chi te chu sing fe in a tlawm tawh dawn a, ram mipuite chuan GST thar hi a taka hman hun an nghak thup tawh niin a sawi a ni.

<><><>

PM MODI

Prime Minister Narendra Modia chuan NDA MP te chu tunhnaia sawrkar thutlukna pawimawhte chu nasa zawka mipuite hrilhhre turin a chah. Nimina BJP leh NDA MP te tana ni hnih awh workshop kharnaah he thu hi sawiin Pu Modia chuan Goods and Services Tax (GST) leh Promotion and Regulation of Online Gaming Act 2025 te chu a tam thei ang bera puangzar turin MP te a chah a ni.

Union Parliamentary Minister Kiren Rijiju chuan workshop ah hian Prime Minister Modia chuan India tana a hmathlirte a sawi a ti a. Parliament in bill tha tak tak a pass theih avanga lawmawm a tih thu a sawi bawk a ni ti bawk.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hniah tittlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST thar hian ramchhungah lawm a hlawh hle a. Kan Correspondent sawidanin GST thar avang hian infiamna sports sector pawhin hma a sawn phah dawn a. Infiamna bungraw hrang hrangte a man tlawm ang a. GST hmasaa chhiah zaa 12 lak thin kha tunah chuan zaa 5 lak a ni tawh dawn a ni. Union Sports and Youth Minister Mansukh Mandaviya chuan GST siamthat chuan infiamna bungruate mitin banphakin a ti tlawm dawn tih sawiin infiamna leh taksa tih fit kawngah mi tam zawk an inhmang thei dawn a ni a ti.

<><><>

NEPAL

Nepal sawrkarin Social Media a khap avanga thalai lungawilohna lantirnaa tharum thawhna thlengah mi 19 an thi a, mi 240 chuangin hliam an tuar. Nepal sawrkar hian Facebook, Instagram, X leh Youtube bakah social media platform dangte hi September ni 4 atang khan an ramchhungah a titawp a. Sawrkar thutlukna avang hian rampumah lungawilohna lantir niin Kathmandu-ah chuan Baneshwar-a Federal Parliament luhchhuah tumte lakah police ten silai an hmetpuak hial a ni. Nepal ramchhung hmun tam zawkah curfew puan nghal a ni bawk.

<><><>